

ARREST DV

CONSEIL D'ESTAT DV ROY,
contenant le Reglement que sa Majesté
veut & entend estre gardé & obserué
en la perception des droicts attribuez
pour signature de Roolles aux Esleuz,
& droict de Bordereau, Greffiers en chef
des Eslections, Maistres Clercs, Greffiers
des Affirmations & gardes Seau, ensem-
ble des Commissaires & Sergens des
Tailles.



A PARIS,

Chez FED. MOREL, & P. METTAYER,
Imprimeurs ordinaires du Roy.

M. DC XXIII.

Avec Privilege de sa Majesté.

Case


F

39

326

1623 fr

THE NEWSPAPER
LIBRARY



EXTRACT DES
REGISTRES DV
Conseil d'Estat.



VR ce qui a esté representé au Roy en son Conseil, Que les Presidens & Tresoriers generaux de France de plusieurs Generalitez de ce Royaume, ont receu plaintes des Officiers des Elections, qu'à cause des droicts attribuez par sa Majeste depuis l'annee mil six cens seize, à differents Offices, & à prendre par les mains des Collecteurs des Tailles des Paroisses: Lesdits Collecteurs en recoiuent tant d'incom-

modité, que tous les habitans desdites Paroisses qui sont soluable refu-
 sent la collecte de la Taille : telle-
 ment qu'en plusieurs Paroisses on
 n'a encores peu eslire de Collecteur,
 & que cela prouient de ce que les
 Collecteurs sont contrainsts de payer
 lesdits droicts à trop de person-
 nes differentes, lesquelles, faisans
 ou leurs Commis, leurs demeu-
 res en diuers lieux, & ne se ren-
 contrans en leurs maisons lors que
 lesdits Collecteurs vont au bureau
 de la recepte porter leurs tailles: ils
 sont contrainsts de sejourner plus
 long temps qu'ils n'ont accoustumé,
 ou retourner expres vn autre iour:
 ce qui les consomme en fraiz, & ou-
 tre les diuertit de leur labeur & vaca-
 tion, qui leur est vne seconde perte,
 & qu'il est aduenu en aucuns lieux,

§

que ceux qui ont pouuoir des Ac-
quereurs desdits Offices de receuoir
leurs droicts apres s'estre absentez de
leur demeure, & laissé expirer le
temps dans lequel lesdits droicts
doiuent estre payez, ont enuoyé des
Sergens avec leurs certifications aux
Collecteurs, lesquels ont exigé pour
leurs voyages beaucoup plus qu'il ne
leur en appartient, ou vsé de cōtrain-
tes si rigoureuses à l'encontre d'eux,
qu'ils les ont entierement ruinez.
D'ailleurs, qu'aucuns commis à l'e-
xercice des offices de Commissaires
des Tailles abusans de l'auctorité des
possesseurs desdits Offices, font venir
és Villes ou Paroisses de leur demeu-
re les Assesseurs des Tailles, pour faire
l'assiette & departement desdites
Tailles & Cruës, soit pour auoir plus
de pouuoir en ladite assiette, ou pour

forcer lefdits Affecurs à leur faire
 quelque present pour estre plus
 promptement expediez : Mesmes
 qu'il y a aucuns Officiers desdites Es-
 lections, & Receueurs des Tailles qui
 se font payer par aduance les droicts
 de signature de roolles, de bordereau
 & port de Commissions, que les Af-
 fecurs Collecteurs sont contrains
 d'emprunter à interests, & qu'il im-
 porte au bien des affaires & seruice
 de sa Majesté, de pouruoir sur lefdi-
 tes plaintes, & empescher que ses
 subjets ne soient indeüement mo-
 lestez & trauaillez pour le payement
 & perception desdits droicts. LE
 ROY EN SON CONSEIL, a or-
 donné & ordonne, que d'oresnauant
 & à tousiours à commencer du pre-
 sent quartier de Ianuier, les Officiers
 des Elections qui iouyssent des

droicts de signature de roolle & bordereau : Ensemble tous Acquereurs & possesseurs d'offices de Greffiers des Elections en chef, de places de Maistres Clercs esdits Greffes, Greffiers des Affirmations, & Gardes du petit Seel desdites Elections, & des droicts attribuez ausdits Offices, leurs Commis & Procureurs, seront tenus de conuenir d'une mesme & seule personne par chacune annee, & s'assembler à certain iour, au lieu où se tient le Siege de l'Election: Sçauoir, en la presente annee dans le present mois de Mars, Et pour les suiuanes dans le mois de Ianuier; pour de quartier en quartier, recevoir lesdits droicts attribuez à leursdits Offices des mains des Collecteurs lesquels par les Edicts sont payables par lesdits Collecteurs: &

celuy qui sera pour ce nommé & commis, tiendra son bureau en lieu commode, & s'y rendra assidu pour faire ladite recepte sans vsfer de retardation; Autremēt lesdits Collecteurs pourront deliurer leurs deniers au Greffier de l'Eslection, qui leur en donnera ses certifications, lesquelles seruiront de descharge ausdits Collecteurs enuers tous qu'il appartiendra. Et de ladite nomination les Affecurs Collecteurs en seront aduertis par affiches publiques, lesquelles se mettront aux lieux où se tient la Iurisdiction des Esleuz, & les bureaux de la recepte & greffe de l'Eslection: & où dans six sepmaines apres chacū quartier expiré lesdits droicts ou partie d'iceux ne seront payez, sera permis aux Officiers de l'Eslection de decerner leurs contraintes contre lesdits Col-

Collecteurs pour ce qui en restera
 deub, & les faire executer par vn seul
 Huissier ou Sergent de l'Eslection,
 aux fraiz & despens desdits Colle-
 cteurs, lesquels seront taxez par les-
 dits Officiers selon les Ordonnances.
 FAICT sa Majesté defenses aux Pre-
 sidents, Lieutenans, Esleuz, Controol-
 leurs Esleuz & autres Officiers des-
 dites Eslections, de prendre ny rece-
 uoir les droicts de signature de rool-
 les & de bordereaux, pour les deniers
 du principal de la Taille & Creües y
 jointes, & grande Creüe extraordi-
 naire, que de quartier en quartier:
 Cōme aussi aux Receueurs des Tail-
 les & autres, les droicts de port de
 Commission & mandement dudit
 principal de la Taille & Creües y
 jointes, & grande Creüe extraordi-
 naire à peine de concussion. Et pour

le port des Commissions de chacune Creüe extraordinaire, il le payera avec le premier payemēt des deniers desdites Creües. Enjoint sa Majesté à tous Commissaires des Tailles, leurs Commis & Procureurs, de se transporter dans les Paroisses, comme ils sont tenus par l'Edict de la creation desdits Offices aux iours qui leur seront declarez en parlant à leurs personnes ou à leurs domiciles, à la requeste & diligence des Affeours, pour escrire souz lesdits Affeours la minute des roolles de l'assiette des Tailles, Taillon & Creües: Et à cette fin esliront leur domicile dans le present mois de Mars, en la Paroisse, où l'vne de celles pour lesquelles chacun office de Commissaire est particulierement estably, à peine de tous despens, dommages

& intereſts deſdits Aſſeours . Et à
 faute de ſatisfaire par leſdits Com-
 miſſaires des Tailles ou leurs Com-
 mis à ce qui leur eſt enjoint, Permet
 ſa Maieſté auſdits Aſſeours de pren-
 dre d'autres perſonnes pour la con-
 fection deſdits roolles, dont les pei-
 nes, ſalaires & vacations ſe taxeront
 par les Eſleuz, & ſe prendront ſur le
 ſol pour liure attribué & apparte-
 nant auſdits Commiſſaires. Et ne
 pourront leſdits Commiſſaires des
 Tailles ny les Acquéreurs de la pro-
 priété des offices de Sergens des Ay-
 des & Tailles des Paroiſſes ou leurs
 Commis & Procureurs, recevoir les
 droicts du ſol pour liure, & des ſix
 deniers pour liure ailleurs que dans
 la Paroiſſe de leur eſtabliſſement,
 ſans qu'ils puiſſent obliger les Col-
 lecteurs des Tailles de les porter ny

payer en autre lieu, sinon de leur gré & consentement. Enjoint sa Majesté aux Presidens, Tresoriers de France, & Generaux des finances de ce Royaume, & aux Presidens, Lieutenans & Esleuz, & autres Officiers qu'il appartiendra, de faire inuiolablement garder & observer le present Arrest, & iceluy faire publier en leurs Bureaux & Sieges à trois divers iours de plaids, & faire afficher par les lieux & endroits publics de la Ville où leldits Bureaux & Sieges sont establis: Ce qui se fera à la diligence des Substituts du Procureur general de sa Majesté. Et sera iceluy adressé aux Presidens & Tresoriers de France pour enuoyer copie deüement collationnee aux Officiers des Eslections du ressort de leurs Generalitez, & certifier sadite Majesté

dans deux mois desdites publications & affiches dudit Arrest.

FAICT au Conseil d'Estat du Roy tenu à Paris, le vnzième iour de Mars, mil six cens vingt-trois.

Signé, DE GVENEGAUD.

Collationné à l'original, par moy Conseiller,
Secretaire du Roy.

Sommaire du Privilege.

PAR Lettres patentes du Roy, donnees à Paris le vingt-deuxiesme iour de Feurier, mil six cens vingt, signees, **LOVIS**, & sur le reply, Par le Roy, **DE LOMENIE**, & scellees du grand scel dudit Seigneur, en cire iaulne, sur double queüe: verifiees, tant en la Cour de Parlement, Chambre des Comptes, Cour des Aydes, Chastelet de Paris, qu'au Bailliage du Palais: Il est permis à Federic Morel, & Pierre Mettayer ses Imprimeurs ordinaires, d'imprimer, ou faire imprimer, vendre & debiter tous Edicts, Ordonnances, Mandemens, Lettres patentes, comme aussi tous Arrests, tant de son Conseil, que de ses Cours, sans qu'autres Libraires & Imprimeurs les puissent imprimer ne faire imprimer, vendre ne distribuer, en quelque sorte & maniere que ce soit, sur peine de cinq cens liures d'amende. Voulant au surplus, que tout ce qui se trouuera imprimé de ce que dessus, par autres que lesdits Morel & Mettayer, soit saisi & cancelé comme nul & faulx, & faict contre son auctorité & commandement.

